





1618 47

DECLARATION

ET PROTESTATION
DE MONSEIGNEVR

le Prince.

PRESENTEE AV ROY. 20

ENSEMBLE LA LETTRE PAR LUY
*enoyée à la Cour de Parlement,
de Paris.*

M. DC. XV.

Case

F

39

.326

1615

code 2

THE NEEDHAM
LIBRARY

DECLARATION ET
*iustification des actions de Monseigneur
le Prince.*

CHacun sçait que Monseigneur le Prince
des. ja plusieurs fois, à fait entendre au Roy
& à la Roynę sa mere, les grands maux &
desordres, qui trauaillent ce Royaume, & qui
multipliez par le temps, s'aduancent plus que
iamais pour le porter à sa ruyne, si par la pruden-
ce de leurs Maiestez, il ny est bien tost pourueu.
Ce fut l'an passé, le subiect de ses tres-humbles
remonstrances, lesquelles il presenta à la Roynę
Regente, par l'aduis de bon nombre de Princes,
Officiers de la Couronne, Seigneurs & Gentils-
hommes, dont il estoit assisté. Mais deslors les
mauuais Conseillers, que les ennemis du repos
& tranquillité de la France, tiennent à gaiges
prés de leurs Maiestez, au lieu de faire profit de
ses aduis, conuertissant cét aliment en poison,
furent du remede l'entretienement de la maladie,
& voyant que par ce moyen leurs mauuais des-
seins seroient recogneus, & leurs proiects ren-
dus inutiles, cuidans couvrir leurs fautes, &
esloigner d'eux le blasme & reproche qu'ils ne
pouuoient euitier, ils eurent recours aux artifi-
ces, dont en tous siecles se sont seruis ceux qui
coniurent à la ruyne de ce Royaume, & ont à
cette fin entretenu le desordre, & la confusion,
car comme les maux estoient sans nombre, aussi
ne pouuoient ils faire que la doleance publique

ne vint frapper l'oreille du Roy, & de la Roynne
 sa mere & n'esmeust leurs compassions au soulage-
 ment du pauvre peuple, & leur iuste vengeance
 contre les auteurs de ceste generale diffi-
 pation, pour desfourner ce coup qui alloit tom-
 ber sur leurs testes, & ruyner leurs desseings.
 Ils s'armerent d'audace & d'impudēces qui est le
 dernier refuge de tous les meschans, & osent calō-
 nier les plus saines intentions dudit seigneur
 Prince, & de tous ceux qui estoient ioinct avec
 luy, afin qu'ayant preueni la liberte du iugement
 de leurs Majestez par vne mauuaise impres-
 sion, contre leurs personnes, toutes leurs actions leur
 furent suspectes & odieuses, enquoy la trop
 grande credulite de la Roynne favorisa grande-
 ment leurs desseings, car luy ayans fait enten-
 dre que la reformation qu'on demandoit en l'E-
 stat, n'estoit qu'un pretexte pour luy en oster le
 gouvernement, que les plaintes publicques qui
 sont les gemissemens, & comme les derniers
 soursirs de tant de milliers d'hommes estoient
 la voix d'un peuple mutin & rebelle amateur de
 nouveauté, & desireux des troubles domestic-
 ques: Telles impostures ayant ietté la desffiance
 dans l'esprit de sa Maiesté, elle se laissa facile-
 ment emporter a la force de leurs persuasions, &
 ferma l'oreille a ses remonstrances qui eurent un
 effect du tout contraire à l'intention dudit sei-
 gneur Prince, & au vœu de tous les gens de bien,
 car prenant de la gauche, ce qu'il bailloit de la
 droite, au lieu de iustice qu'il demandoit, on
 parle de l'opprimer par les armes & les forces du
 Roy, on dressa à cette fin nouveaux regimens.

5
On fist des leuees de Suisses, on assemblea des
troupes en corps d'armée, on tira du tresor de la
Bastille, l'argent que le feu Roy y auoit mis pour
la necessité & le salut public, afin de l'employer
contre son propre sang, contre les plus fideles
seruiteurs, par ce qu'ils auoient olé ouvrir la
bouche pour parler des miseres & calamitez pu-
briques, & de la reformation des desordres de
l'Estat.

Mais telles procedures contre des personnes
suppliantes innocentes, & des armées ayans esté
publicquement detestées, il se trouua encores
quelques gens de bien pres de leurs Maiestez qui
arrestèrent l'exécution d'un si pernicieux Con-
seil, & lors on proposa vne conference, laquelle
commencée à Soissons, conclüe à Sainte Me-
nehould par vne belle resolution d'assembler les
Estats generaux qui est l'antien, & plus salutaire
remede des playes domesticques de ce Royau-
me, faisoit esperer qu'en ceste assemblée, se pour-
roient trouuer des moyens pour remedier aux
maux de cet Estat, & le remettre en son ancien-
ne dignité & splendeur, Chacun s'en promet-
toit vn heureux succès & tout autre que l'issüe
n'a faict paroistre, les remedes qu'on y à applic-
qués s'estans rendus plus propres à nourrir & en-
tretenir le mal qu'à l'esteindre, comme souuent
vne mesme cause produict vn effect tout con-
traire à soy-mesme. Aussi de bonne heure ceux
qui sçauent iuger des effects par les causes & par
coniectures de l'aduenir preuoir la suite des af-
faires, recogneurent bien tost que le fruit n'en
seroit tel qu'on l'auoit esperé, & que le traja

qu'on leur faisoit prendre, en rendroit le succez moins fauorable. Car dès l'entrée ceux que l'ambition, l'auarice, & autres particuliers interests portoit à d'autres desseins, & qui impatiens du repos & prosperité de la France, sçauoient tres-bien n'y pouuoir paruenir que par la confusion, ruine & destruction de cét Estat, craignans que les Estats n'en arrestassent le cours, & leussissent rēdre cōpte de leur mauuaise administration, ne pouuans se représenter vne telle assemblée qu'avec l'aprehension des peines qu'ils meriterent, n'ont obmis pratiques ou artifices quelconques, pour l'eluder & rendre inutile. Et pour en doubler la conuocation, ils sulciterent la mutinerie de Poictiers, ou Monseigneur le Prince s'estant acheminé, avec quelques vns de ses domestiques, pour demander raison d'une insolence commise en son endroict, par l'outrage fait à vn des siens, ils exciterent par leurs Emissaires vn nombre d'habitans qu'ils cognoissoient bien, entendus à promouuoir des seditions, lesquels remplirent la ville de frayeurs & de vacarme, comme si les ennemis eussent esté à leurs portes. Dequoy ledit seigneur Prince s'estant plainct à la Royné, & demande Iustice de ceste procedure si sedicieuse & si insolēte, les mauuais Conseillers gagnirent aussi tost l'oreille de sa Majesté, la remplirent de calomnies & de fausses impressions, cōme s'ils eussent voulu se saisir de la ville de Poictiers, chose ridicule, qu'un Prince desarmé sous la foy publique d'un traité, accompagné seulement d'un petit nombre de ses domestiques: aye voulu executer vn si grand dessein,

& s'emparer d'une ville de si grande imporrance au milieu du Royaume, luy qui estant armé ne l'a pas entrepris sur des places de plus libres accès. & beaucoup plus faciles à garder. Mais ils auoient opiniõ qu'il vouldroit poursuiure la vengeance de cet offence, tât eux-mesmes la croyoient iustes: & que la réparation luy en estant déniee, ainsi qu'elle a esté iusques à present, cela le porteroit à quelque extremité, & qu'ainsi ils romproit la conuocation des Estats par le trouble. Toutes-fois ledit seigneur Prince, pour le bien du Royaume, s'estant contenu en repos, & dissimulé ceste iniure, se voyant sans excuse de tenir les Estats, ils prindrent resolution de les dresser, & faire reülsir, en sorte que les iustes plaines des subiets du Roy, & fussent supprimees, les entreprises & trahisons contre l'Estat dissimulees, l'impunité des crimes fauorisee, le desordre & la confusion establie, toutes sortes de maux autorisez pour le passé prouignez pour l'aduenir, & le nom d'Estats à iamais odieux & abominable aux François pour cet effet, ils firent des menees dans toutes les Prouinces, afin de faire eslire des deputez à leurs postes, n'ayant fait appeler aux conuocation particulieres que ceux que bon leur a semblé faisant donner des pensions aux vns des promesses aux autres, employant audacieusement à telles corruptions, le nom du Roy & de la Royne sa mere, iusques à faire retracter l'élection de plusieurs, disans qu'ils n'estoient point agreable a leurs Maiestez en quelque endroit ceux de leurs faction se sont deputez eux mesmes ayans employé à force ou-

uerite ce qu'ils ne pouuoient esperer par les formes legitimes & ordinaire: Bref la liberte de l'election y a esté entierement oprimee par monopoles, corruptions, menaces & violences, & ont esté les Estats composez de personnes deputees par telles voyes, on ne s'est pas contenté de cela, on a enuoyé par les Prouinces des memoires de ce que l'on vouloit estre mis dans les cahiers, lesquels en beaucoup de lieux, voire quasi par tout ont esté dressez sans les communiquer aux corps des villes & communautez, tant de la noblesse que du peuple: de sorte qu'il se peut dire avec verité, que ceste assemblee n'auoit des Estats autre chose que le nom. Le peuple en a crié, & s'en plaint encore par tout publiquement: mais ceux qui profitent de sa misere, & moissonnent ses calamitez, scauent par trop d'experience qu'ils en ont, que telles plaintes vieillissent incontinent, & se perdent, & se promettent que toutes sortes de maux seront tous-jours supportables par accoustumance. Aussi le peuple n'a encor senty aucun soulagement de ces Estats, n'en a peu conceuoir aucune bonne esperance, ny reconnu autre chose qu'infinis presages d'une plus grande calamité.

Le Tiers Estat qui estoit la plus saine partie de l'assemblée, auoit voulu selon l'affection qu'il porte au Roy, pouruoir à la seureté de sa personne, par vn remede ibgé conuenable par tous les gens de bien. Aussi tost se sont esleuez des gens si peu affectionnez, si desloyaux, & si infideles à leur Roy, si ingrats à leur patrie, qui ont fait la vie des Rois estre le subiect d'une question
proble

problematicque, & matiere de discordé dans les Estats. Là dessus on a donné vn arrest au Conseil du Roy, par lequel on a imposé silence aux vns & aux autres, comme si la seureté de la vie des Roys estoit vne proposition scrupuleuse, ou vn affaire qui ne fust pas digne d'esmouoir de la dissension. Ce pendant on a semé parmy le peuple des libelles, qui font dependre la personne & les Estats des Roys d'une autre puissance; & leur vie de la fureur des assassins, qui voudront les tenir pour Tyrans, selon l'opinion ou le commandement qu'ils en pourront auoir. Et ce qui est bien honteux en vn Estat tel que la France, ces liures s'impriment & se font par les bons sùiects à telles impietez n'ont cette mesme licence & ne se publient qu'avec danger. Et si par vn tel silence, ou pour mieux dire, par vne lasche preuarication, on a consenty à l'establissement d'un mal si dangereux contre les sacrées personnes des Roys, iusques à faire rayer des cahiers des Estats l'article qui portoit la recherche du detestable parricide commis en la personne du feu Roy de tres-heureuse memoire, dont la playe encore toute sanglante crie vengeance deuant la iustice de Dieu contre les perfides auteurs de sa mort, que peut croire le peuple qu'il y ait plus d'affection à faire cesser les maux qui le tourmentent, & qui pourront encores naistre pour sa dernière desolation?

On a veu le Mareschal d'Ancre, que la faueur seule, non le merite, l'extraction, ny les seruices rendus à la Frâce, a introduict és premières charges & plus importants gouuernemens de l'Estat con-

tre les loix du Royaume, faire attenter audacieusement, à la face des Estats, des assassinats contre la Noblesse François, avec telle impunité que les plaintes ont esté tenuës pour crimes, & le ressentiment d'une si iuste douleur estouffé par la faueur d'une puissance absoluë, & par les menaces d'une dernière violence (ce qui a depuis peu de iours donné l'audace à vn soldat Italien de la citadelle d'Amiens, d'assassiner publiquement le sieur de Prouille Sergent Maior de ceste ville frontiere, sans que iusques icy la iustice en ait esté faite.) Et en mesmes temps des poursuites rigoureuses contre des Gentils-hommes François, pour des causes legeres & de petite consequence, pour s'estre ressentis de la perfidie & trahison domestique de quelques seruiteurs infidelles, mises neantmoins au plus haut degré d'offense, d'autant qu'ils affectionnoient le service dudit Seigneur Prince, & qu'il en prenoit la protection. On a veu arriuer dans la ville capitale du Royaume, des personnes detestables appelees de toutes les parties de l'Europe, sous diuers pretextes, auoir faueur en Cour, & entree en plusieurs grandes maisons, mais particulièrement dudit Marechal, Iuifs, Magiciens, empoisonneurs, assassins, par le ministere desquels on a dressé plusieurs proieets contre la vie dudit Seigneur Prince, & de Monsieur le Duc de Longueville, & d'autres Princes & Seigneurs, qui comme luy affectionnent le service du Roy, & l'Estat, & sont ennemis du desordre & de la confusion.

On a veu en ce mesme temps receuoir toutes sortes d'aduis & inuentions, pour leuer deniers

sur le peuple, trente cinq ou quarante Edicts scellez pour cet effet: Mais ces deniers, non plus que ceux qui procederont de la nouvelle reuente des greffes & autres domaines, qui par le bon mesnage du feu Roy s'en alloient dans peu de temps desengagez, ne sont pas destinez pour entrer es coffres du Roy, ny pour uoir aux necessitez publiques de l'Estat, mais pour assouuir l'auarice insatiable du Marechal d'Ancre, qui est telle, qu'il se verifera que depuis la mort du feu Roy par diuers moyens, & par suppositions de noms empruntez pour faciliter la verification des dons, il a tiré de deniers clairs plus de six millions de liures.

On a veu aussi les efforts qu'il a faicts cy-deuant pour arracher des mains dudict sieur Duc de Longueuille le gouuernement de Picardie, l'un des plus importans du Royaume, luy faisant proposer des recompenses excessiues de deniers, & par vn exemple honteux mettre à prix d'argent ce qui a esté donné pour recompense à la vertu & fidelité de ses predecesseurs. Ce que n'ayât peu obtenir, on à veu depuis peu de iours la violence que sous le nom du Roy, il a fait faire dans Amiens, afin de s'y rendre le plus fort, pour obliger sa Maiesté à redoubter sa puissance, & supporter ses actions & deportemens, par la crainte de perdre vne place si importante, quand il luy prendra fantasie de se soustraire de son obeissance, chose qui arriue facilement à des personnes de sa condition, qui n'ont aucune affection naturelle ny interest à la conseruation de l'Estat.

On a veu & voit-on encore tous les iours à la honte de la France, c'ér estranger avec ses supposts estre la porte des honneurs & des charges publiques, disposer des benefices, & des gouuernemens, distribuer les pensions, estre arbitres & dispensateurs de toutes les graces, iusques à donner la vie ou la mort aux subiects du Roy, selon qu'il leur plaist en faire accorder ou refuser les remissions. Ainsi aux despens de sa Maiesté, & au grand preiudice de son seruice, ils ont fait nombre de creatures, & en pourront encores faire d'auantage, quand apres l'extinction du droit annuel qu'ils ont ardemment poursuuie, ils auront tout pouuoir de disposer des offices, taschâs par telles voyes illegitimes, en la foiblesse de l'aage du Roy, luy desrober l'affection de ses subiects, faisans dependre d'eux & de leur faueur tout le bien qu'ils en peuuent esperer, cependant que sa Maiesté demeure chargée de l'enuie du ioug insupportable qu'ils ont imposé sur son peuple, qui est le chemin des plus hautes entreprises & vn tesmoignage asseuré que leurs desseins ne sont pas petits, quand ils ne gagneroier autre chose qu'une assez forte puissance pour se rendre formidables au Roy, & se maintenir contre sa iustice, laquelle ils redoubtent plus que chose du monde.

Ces choses, & grand nombre d'autres semblables, entreprises avec hardiesse, & attentees avec toute impunité, ont fierement paru à la face de ces Estats, ausquels n'estant resté que le nom de leur ancienne dignité, il n'a pas esté loisible d'y rien proposer sans le consentement de ceux qui

font auteurs des desordres, dont on auoit à demander la reformation, & si quelques gens de bien non souilleez de corruption, & dans le cœur desquels estoit encor reseruee quelque viue estincelle de la vertu de nos ancestres, ont tressailli de douleur en leurs courages, & ietté les derniers sanglots de la liberté mourante, le grand nombre, les menaces & le nom du Roy, qu'on employe indignement pour autoriser le mal, & renuerser les bons Conseils, ont tousiours imposé silence, & estouffé par ce moyen si peu de bien que lon pouuoit esperer de ceste assemblee, en laquelle ledit Seigneur Prince ayant resolu d'aller pour exhorter vn chacun de déposer tous interests, & ne se porter qu'aux affections qui ont pour but le vray seruice du Roy, & le soulagement de son peuple, pour s'exposer soy-mesme le premier à la censure des Estats, & refueiller leur fidelité & leur diligence à faire tout deuoir de mettre en euidence les causes & les auteurs de tant de miseres, proposer les remedes, & supplier le Roy de faire punir les coupables, ces infidelles & desloyaux Conseillers employerent encor le nom de sa Maiesté pour seruir de rempart à leurs meschancetez, & furent bien si audacieux de luy faire dire que le Roy luy defendoit d'aller aux Estats, & firent en sorte par le monopole de leurs partisans & pensionnaires, que s'il s'y fust présenté, il n'y eust esté receu avec l'honneur qui luy est deu, & au rang qu'il tient en ce Royaume.

Et bien que ledit Seigneur Prince se fust abstenu de l'entree desdicts Estats, & qu'on ne luy

peust imputer aucune faute, sinon que sa trop ardente affection au service du Roy & au bien de son Estat, luy tourne à malheur & à crime, & donne prise à la calomnie. On ne laissa pas neantmoins de tenir la nuit des Cōseils secrets, composez de trois ou quatre personnes de peu de valeur, où fut deliberé de se saisir de la personne dudit seigneur Prince & d'autres Princes, Officiers de la Couronne & Seigneurs, qui ne peuvent non plus que luy voir la Maïesté de leur Roy si miserablement foulée aux pieds, ny supporter vne si honteuse & si licencieuse profanation de toutes choses. Et pource que le peuple n'eust peu estre persuadé que telles violences enssent esté commandees par le Roy, il fut aussi conclu dans les mesmes Conseils de desarmer les Parisiens, de changer les Cappitaines des quartiers, d'oster les chaisnes des rues pour diminuer la force de la ville, & d'y mettre les Suisses & autres gens de guerre: l'audace de tels Conseillers estant montée si haut que de croire toutes choses faisables & faciles pour l'exécution de leurs pernicieux desseins.

Or cōme ces Estats n'ont apporté aucun fruit, sinon des pensions & coadintoreries à plusieurs Epeutez de conscience venale, mais au pauvre peuple redoublement de miseres & d'aprehensions. La Cour de Parlement de Paris, qui en diuers temps a rendu tant de tesmoignages de sa fidelité pour la conseruation de ceste Couronne, qui veille continuellement pour le service du Roy, & a tousiours si vtilement adressé ses conseils au bien de l'Estat, auroit par Arrest du xxviiij

du mois de Mars dernier arresté sous le bon plaisir de sa Majesté, que les Princes, Ducs, Pairs & autres officiers de la couronne, qui ont seance & voix deliberatiue en la Cour, seroient inuitez de s'y trouuer, pour aduiser sur les propositions qui seroient faictes pour le seruice du Roy, soulagement de ses subiects & bien de son Estat.

Mais ceux qui n'ont establisement que par le desordre & la confusion, estimans que toute poursuite de reformation tend à les perdre, tascherent aussi tost de persuader à sa Majesté que le Parlement auoit entrepris sur son autorité, & par diuers artifices luy rendre les droictes intentions de ceste compagnie suspectes, iusques à l'esmouuoir à des d'indignation. Surquoy le Parlement ayant dressé ses remonstrances en termes humbles & respectueux, selon la prudence singuliere de ceste compagnie, & icelles portees & presentees au Roy avec toute la reuerence qu'il se pouuoit desirer, sa Majesté auroit entendu par la lecture d'icelles ce que son Parlement auoit iugé estre de son seruice, & du bien vniuersel de son Estat, luy ayant représenté les causes du mal qui l'afflige, & fait assez recognoistre ceux qui en sont les auteurs & la cause. Cela faisoit esperer à vn chacun de voir bien tost vne grande reformation, vn bon ordre aux affaires, & des exemples de Iustice en la punition des coupables. Mais ceux-là mesmes qui par leurs deportemens ont donné subiect à ces remonstrances, & qui y sont assez designez, au lieu de se iustifier ou se contenir en quelque modestie, rousiours bien seante à des accusez, abusans de plus en plus de

l'autorité du Roy, se sont portez à vne dernière action la plus outrageuse à l'honneur de sa Majesté, & la plus profane à l'endroit de sa justice, qui puisse tomber en l'imagination des hommes, ayans entrepris, eux coupables, accusez par la clameur publique, & notoirement convaincus des cas mentionnez esdictes remonstrances, de complotter vn arrest qu'ils disent estre du Conseil du Roy, & toutesfois dressé & resolu contre l'aduis de la pluspart des anciens Conseillers de sa Majesté, qui ont la voix de tous les gens de bien, pour tesmoignage de leur fidelité & affection à son service & au bien de son Estat; par lequel Arrest ils declarent le Parlement incompetent de représenter au Roy les maux & les desordres qui vont tous les iours multiplians à la foule de ses subiects, & à la ruine de son Estat, prononcent calomnieuses ces remonstrances, les appellent entreprise & desobeyssance enuers sa Maieité, & ordonnent que pour en esteindre la memoire, elles seront biffées, & ostées de Registres de la Cour, & le Greffier tenu de les rapporter à sa Maieité, à peine de priuation de sa charge.

En quoy ils font assez cognoistre qu'ils n'ont autre but que d'estouffer la verité par les chicaneries, dont ont accoustumé de se servir les plus miserables, pour euitier la punition & le chastiment de leurs malefices. C'est l'ordinaire des meschans garnemens, quand ils sont accusez, de proposer incompetences, prendre les Iuges à partie, & faire mille incidens pour employer le temps à autres choses qu'à la cognoissance de leurs

leurs crimes, qui par ce moien demeurent souuent
 impunis. Chose estrange qu'il ne soit loisible
 à ceux qui souffrent de se plaindre, & rechercher
 les remedes pour leur soulagement, cela ne se
 peut appeller autrement qu'une violence faite à
 la nature, qui a dès la naissance inspiré ces affe-
 ctions à tous les animaux pour leur propre con-
 servation. Ceste compagnie de peu de person-
 nes, qui se dit le Conseil du Roy, reçoit tous les
 iours sous le nom de sa Maiesté toutes sortes
 de propositions, qui vont à la foule du peuple,
 & à la dissipation de l'Estat, & n'y a rien de plus
 commun que les Arrests pour le droit d'aduis
 de ceux qui sont auteurs de telles inuentions,
 condamnées par plusieurs ordonnances de nos
 Rois, qui veulent que telles gens soient chastiez
 comme perturbateurs de la tranquillité public-
 que. Et quand le Parlement en a representé le
 desordre, à voulu proposer ce qu'il a iugé estre
 du bien du service du Roy, & du soulagement de
 son peuple, ce mesme conseil, abusant trop indi-
 gnement de l'autorité de sa Maiesté, en la foi-
 blesse de son aage, luy a fait reietter avec paroles
 d'indignation, ce qui parloit de ceste compagnie
 venerable, comme si elle ne meritoit la faueur
 de son oreille, ou du moins le mesme traitemēt
 que recoiuent les moindres & plus contemptri-
 bles personnes d'entre le peuple. Mais il ne faut
 trouver estrange, si ceux, qui ont violé toutes les
 loix, & renueršé tout ordre de iustice, s'efforcēt
 d'abbatre l'autorité du Parlement, estant la
 chose du monde qui leur est la plus contraire,
 qui fait plus trembler leurs consciences viciees

de leurs meschancetez, & contre laquelle ils croient auoir vn iour besoin d'alleguer incompetence, dont ils cherchent par tout les moyens; ayans desia pour cest effect, tiré quelques pieces des Registres du grand conseil, afin que releuees par dessus toute autre puissance, ils soyent les seuls iuges de toutes leurs actions, se puisse iustifier eux mesmes, & prononcer calomnieuses toutes plaintes, comme ils ont faict les remonstrances de Parlement. Et si l'aage du Roy ne luy permet pas d'appercevoir les dangers qui l'environnent, & que tout accez à sa personne estant fermé à ceux qui l'en pourroient aduertir, il ne reste plus que les plaintes publiques, du peuple, lesquelles touchans en particulier plusieurs Conseillers & principaux ministres du gouvernement, il n'y a lieu au monde où elles puissent estre examinees qu'au Parlement, par l'aduis des Princes, Ducs, Pairs, & autres grands Seigneurs de ce Royaume. Car si les plaintes sont iustes, d'où pourroit proceder vn remede plus salutaire que celuy qui seroit concerté par vne si grande & si prudente compagnie? Si elles sont fausses, où est-ce que les accusez pourroient iamais trouuer vne plus glorieuse iustification, & vn plus honorable tesmoignage de leur innocence? Mais telles espreuues, dignes de plus grands courages & de consciences plus asseurees, ne peuvent estre qu'espouventables à ceux qui interieurement tourmentez du sentiment de leurs crintes, ont desia mille bourreaux en leurs ames, & vne iuste apprehension des supplices qu'ils ont meritez.

Pour ceste cause ils ont cassé ce tant necessaire Arrest du Parlement, & s'efforcent de faire supprimer les remonstrances, afin que le temps & leurs artifices ayans faict perir les preuues, il ne reste plus aucune memoire de si importantes acculations, & que le Roy venu avec les ans à la vraye cognoissance des maux qui affligeront son Estat, ne puisse iamais remonter iusques a leur source, ny prendre vengeance d'une si malheureuse & desloyale administration. C'est à ce mesme dessein qu'ils font precipiter l'execution du mariage du Roy, & en pressent l'accomplissement avec tant d'ardeur, pour s'acquérir les bonnes graces de la Royne future, afin que sa faueur & protection leur soit à iamais vn asyle de toute seurété, contre la haine vniuerselle du peuple, & la malediction de toute la France, qu'ils ont attirée sur eux par leurs violens & pernicious conseils.

Et qui pourroit souffrir plus long temps de tels Conseillers, quatre ou cinq personnes venues de rien, vsurper toute la puissance du Royaume, prendre insollement l'autorité d'ordonner & changer toutes choses à leur poste, renuerser les loix & tout ordre de iustice, d'exprimer & eschaffauder les Parlement, tenir le pied sur la gorge à tous les gens de bien; à tous les vrais François & fideles seruiteurs du Roy, & se iouïr ainsi licentieusement de la fortune de ce grand Empire: Qui souffriroit de voir le Roy exposé comme il est au mespris & à l'irreuerence, toute la Cour estant aujourdhuy à la suite de ceux qui peuent faire donner des pensions,

des benefices , des charges & gouvernemens, qu'on face violence à la porte du Louvre , en la Chambre du Roy, en la presence?

Voila les maux & desordres publics , dont iusques à present Monseigneur le Prince a demandé la reformation , lesquels plusieurs ont mieux aimé voir que prenoir , les sentir iusques au vif que les crone , ostant toute autorité & pouvoir de les destourner à ceux qui ont esté assez prudés & clairvoyans pour les predire , avant qu'ils eussent fait vn si grand progrez , & fussent paruenus à tel excez qu'à peine peut-on supporter le mal , ny en souffrir le remede.

Outre ce que dessus , chacun sçait le mespris qu'on a fait , depuis les alliances d'Espagne , des Princes estrangers , des voisins , & anciens amis & allies de ceste Couronne , & les grands avantages que l'Espagnol en divers endroits a pris sur eux , par la conniuece & preuarication de ces infidelles Conseillers , tesmoin la prise de la ville d'Aix , de Vvesel , & de tant d'autres places occupées & iniustement detenues iusques à present , par le Marquis de Spinola , d'as les pays de Cleues & de Iuilliers , où il eust fait de plus grands progresz il n'en eust esté empesché par les armes de Messieurs les Estats , à qui le public a ceste obligation. Et l'execution du traicté de Zanten dont la memoire est presque perduë , pour auoir esté tant de fois interrompuë & negligee , & maintenant entierement delaissee , fait assez voir , au grád mespris de l'authorité du Roy , que cela se fait pour favoriser les desseins de l'Espagnol , & pour luy donner loisir d'affermir son viciation sur

nos anciens amis & allies. Chacun sçait aussi les
 procédures honteuses & peu conuenables à la
 reputation de la France, dont on a vû enuers le
 Duc de S. uoye, pour laisser opprimer & mettre
 ses Estats en prôye à l'Espagnols, au notable pre-
 iudice de ceste Couronne. Cela leur donne des
 iustes desfiâces, comme si la puissance d'Espagne,
 fortifiée de celle de France, tendoit à l'Empire
 de toute l'Europe, & ne pressoit l'accôplissement
 du mariage du Roy, que pour ce dessein. Ils sça-
 uent que ceste alliance n'est pas seulement de per-
 sonnes, mais aussi de conteils: Ils voyent que le
 Roy va mesler ses affaires avec vn Prince, qui est
 en sa pleine vigueur, luy va ouurir l'entree en
 toutes les parties de son Royaume, cômunique
 tous les cōseils, & receuoir les siens, pour le gou-
 uernement de son Estat, & n'ignorent point que
 la Royne son espouse aura ses affections, ses fauo-
 rits, ses desseins, qu'elle aura bien le pouuoir d'in-
 troduire des Espagnols aux plus grandes charges
 & aux gouuernemens des places plus importan-
 tes, aussi bien que depuis la mort du feu Roy,
 nous y auons veu introduire des Italiens, Que si
 ceste puissance s'establit vne fois, comme il fera
 mal aisé de l'empeschet, cet Estat prendra vne au-
 tre face, par le changement qui s'y fera de toutes
 choses. Ils sont en alarme & pour eux, & pour
 nous du subit partement du Roy, de voir que
 sans necessité, au mauuais estat où sont les affaires
 du Royaume au dedâs, on aille encores, en vn aa-
 ge si tendre faire vn effort à la nature, & hazarder
 la santé de la personne par l'accomplissement de
 ce mariage, qui se pourroit différer à vn autre

temps, pour eniter les dangereux inconueniens que ceste precipitation en fait craindre de toutes parts, dont la calamité est desia cogneüe à tous, les remedes à peu, à la façõ de les appliquer pres- que à personne. Cependant le Roy croistroit de plus en plus avec l'aage, en force de corps & d'es- prit, les affaires pourroient estre en meilleur estat, ses sujets plus contens, ses voisins & allies plus asseurez, & toutes choses avec sa personne plus disposees au mariage. Il ne dependroit plus de l'ambition, de l'auarice, ny de toutes les per- uerses affections d'autres hommes. Il seroit luy mesme arbitre de ses volonte, tiendrait les res- nes de son Empire, n'appelleroit aux charges que les plus affectionnez à son seruice, aux gouuer- nemens que les plus fideles, à son Conseil que les plus gens de bien. Il seroit prudent pour oster le mal du milieu de son peuple, fort pour resister à ses ennemis, puissant pour asseurer les antiens al- lies de sa couronne. Il seroit florissant en paix, in- uincible en guerre, & son Royaume comblé de benedictions du Ciel, & abondant en toutes sor- tes de felicitez. Alors il pourroit accomplir son mariage sans rien craindre, au lieu qu'à present au bruit de son partement, toute la France est en larmes & en affliction, toute l'Europe en alarme, les voisins en desfiace, tout le monde en estonne- ment de la precipitation de ce mariage, alors les subiets l'en supplieroient, ses allies l'y conue- roient, tous les homes ensemble y apporteroient leur consentement, & Dieu sa benediction.

Ceux de la Religion pretendue reformee, qui ne desirant que le repos sous le benefice des

Edicts, disent tout haut que l'on aduance ce mariage, afin de les exterminer durant le basage du Roy, auparauant qu'il puisse cognoistre qu'ils sont membres viles à son Estat, cependant que ceux qui desrent leur ruyne, disposent entiere-ment de sa puissance & de son autorité: que déjà on chante les triumphes en Espagne, qu'un Iesuite l'a presché depuis peu de iours dans Paris, où l'on voit mesmes des liures faits en Espagne & en langage Espagnol, qui le promettent ainsi, & attribuent tous les malheurs que la France a receu depuis cinquanteans, mesmes les detestables parricides de nos Roys à la liberté de conscience qu'ils ont donnée à leurs subiers, & de ce qu'ils ont pris Geneue & Sedan en leur protection. A cela ils adioustent le refus que la Noblesse a fait aux Estats de demander la manutention des Edicts de Pacification, quoy qu'ils doiuent estre tenus & obseruez comme loy fondamentale de l'Estat, & la reception & obseruation du Concile de Trente, iuree si solemnellement depuis peu de iours, par le Clergé assemblé à Paris, à la face du Roy & de son Conseil, au grand mespris de son autorité & de l'honneur de sa Couronne, chose inouye auparauant, & qui n'a iamais esté pratiquée en France ny ailleurs. Ils scauent le soin qu'on rend plus que iamais de ietter & entretenir la diuision parmy eux, & que pour les affoiblir, on tasche de corrompre quelques particuliers d'entr'eux par offres de charges, de dons, & de pensions, Ils voyent qu'en diuers endroits du Royaume, on enfreint les Edicts sans qu'ils en puissent auoir de iustice, & qu'en mesme temps

Sans necessité, il se fait de grands preparatifs de leuees de gens de guerre. Cela leur donne de iustes craintes & deffiances, que sous ombre des mariages d'Espagne, on ne vueille rompre les Edicts, & les reietter aux malheurs dont par le passé on a fait de trop miserables esprenues.

Toutes ces choses ont obligé Monseigneur le Prince de supplier tres-humblement le Roy de pouruoir auant son partement à la reformation de ses Conseils, & aux abus & desordres de son Estat, dont il a nommé les principaux auteurs à sa Maiesté, qui sont le Marechal d'Ancre, le Chancelier, le Commandeur de Sillery, Bulion & Dole, lesquels par leurs violens conseils, & par leurs intelligences secrettes dedans & dehors le Royaume, remplissent tout le monde, les voisins & les domestiques, de soupçons & de mesfiances.

Il ya encor d'autres personnes suspectes à l'Estat, lesquelles ledit seigneur Prince ne nomme point à present pour quelques raisons qu'il aime mieux taire que publier. Cependant pour preuenir la calomnie, & informer tout le monde de l'integrité de ses intentions, il a estimé estre de son deuoir, d'en esclaireir tous Roys, Princes, Estats, & nations de la Chrestienté, & des iustes & necessaires raisons qu'il a eues de se retirer de la Cour.

Dit doncq, Monseigneur le Prince, que depuis la majorité du Roy & la conuocation des Estats generaux, il a tousiours esté pres de sa Maiesté, pour luy tesmoigner par sa presence, & par ses actions la tres humble obeyssance qu'il luy doit & peut dire qu'il ya esté receu avec toutes sor-

res de tesmoignages d'honneur & de bienveillance, quand il s'est teu des miseres & calamitez publiques, au contraire mal traité toutes les fois qu'il est venu à toucher cét vlcere, & que pour aucun interest particulier on ne luy a peu faire abandonner celuy du public, & du bien general de l'Estat. Chacun sçait les mauuais traitemens qu'on luy a faicts, & que nonobstant ces mespris, bien sensibles à vn Prince de sa qualité & de son courage, il a demeuré huit mois à paris sans bouger, quelque mescontentement qu'il ait peu auoir, & quoy que souuent il ait esté excité par son deuoir, appelé par la clameur publique, & pressé par la violence du mal, neantmoins il a tousiours patienté, & tenté toutes voyes, iusques à ce que tout le monde a veu sa preséce y estre plustost mesprisée qu'vtile, que l'autorité Royale estoit demeurée toute entiere entre les mains de ceux qui en abusent pour establir la leur, & que sa trop longue patience tournoit en ruine & dommage à ce Royaume, leur donnant le loisir d'entreprendre toutes choses, pour iniustes qu'elles puissent estre, faisant de leur propre interest vne calamité commune, vne confusion publique. Sa douceur, sa modestie & son respect n'a seruy qu'à les aigrir, & les rendre plus audacieux, & sa longue & extreme patience à les prouocquer à entreprendre sur sa personne & sur sa liberté, lors mesmes que tesmoignant l'entiere confiance qu'il prenoit de leurs Majestez, & que pour oster tous moyens à ceux qui ont tousiours pris plaisir de calomnier ses actions, il remit entre

les mains du Roy, à la face des Estats, la ville & le Chasteau d'Amboise, qui luy auoit esté bail-
lée par le traicté de Sainte- Manchoud, pour
faire voir à toute la France, qu'il ne desiroit au-
tres seuretez que celles qui dépendent de son
innocence, de la bonne grace de leurs Majestez,
& de la bienueillance des gens de bien, & n'y a
artifices ny ruses qu'ils n'ayent employées pour
l'esloigner de la presence du Roy & de ses bon-
nes graces, iusques à se seruir du nom de sa Ma-
jesté, pour luy faire defendre par le sieur de
Saint Geran d'aller au parlement à diuerses oc-
currences qui se presentoient pour le bien de
l'Estat, avec commandement de l'arrester s'il
n'obeissoit à ceste violence, procédant des mes-
mes conseils, esquels plusieurs fois on auoit de-
libéré de le mettre à la Bastille, avec les autres
Princes & principaux Officiers de la Couron-
ne, qui se sont ioincts avec luy pour demander
la necessaire reformation des desordres de l'E-
stat.

En fin ledit Seigneur Prince apres s'estremis
en tout deuoir, & attendu si long temps les re-
medes qu'on auoit fait esperer, voyant qu'on
se resoluoit à faire le voyage de Guienne pour
le mariage du Roy & de Madame, sans y pour-
uoir en sorte quelconque, & que tous les iours
il estoit exposé à toutes sortes de dangers,
afin de ne défaillir en cest endroit au pu-
blic, & pour posseder sa vie en toute seureté &
liberté, se resolut de se retirer en ses maisons,
où ayant demeuré quelque temps on luy fit ou-
uerture d'une conference à Creil, où Monsieur

de Villeroy ayant esté enuoyé de la part du Roy, avec charge seulement de le conuier de retourner à la Cour, ledit Seigneur Prince s'en excusa sur les iustes occasions qu'il en auoit, ne le pouuant faire avec la dignité & seureté qui appartient à vn Prince de la qualité & condition en laquelle Dieu l'a fait naistre, iusques à ce qu'il eust pleu à sa Majesté establir vn ordre en ses Conseils, & pouruoir aux désordres de son Royaume, qui luy auoient esté representez par les remonstrances de la Cour de parlement. Surquoy ayant pleu à sa Majesté renuoyer vers luy ledit sieur de Villeroy à Clermont, avec quelque pouuoir plus ample, ils commencerent la conférence par la reformation desdits Conseils, & l'ordre que sa Majesté y vouloit tenir, dont ledit sieur de Villeroy auoit charge de luy faire voir quelques reglemens, qui auoient esté dressez pour cet effect, lesquels en la plus part ledit Seigneur Prince trouua fort raisonnables: & pour le regard des plaintes publiques contenues és remonstrances du Parlement, il reserua à dire son intention, apres en auoir conferé & pris l'aduis des autres Princes, Officiers de la Couronne & Seigneurs ioincts avec luy, lesquels pour cet effect il pria de se trouuer à Couci le 27. Iuillet, où sa Majesté ayant aussi trouué bon de faire trouuer ledit sieur de Villeroy, ils conferent bien auant sur le subiect desdites remonstrances, en sorte qu'on esperoit qu'il se tireroit du fruiet de ceste conference, au contentement du Roy & du public, si elle n'eust esté rompuë par le sieur de Pontchartrain Se-

eretaire d'Estat, lequel fut enuoyé expres de la part du Roy, pour faire entédre audit Seigneur Prince la resolution que sa Majesté auoit prise de partir le premier iour d'Aoust, & faire son voyage de Guienne pour l'accomplissement de son mariage, & qu'elle le conuioit de l'y accompagner, ou bien dire en presence dudit sieur de Pontchartrain si son intention estoit d'y apporter refus ou difficulté, ce que ledict Seigneur Prince ayant pris pour rupture manifeste de la conference, il supplia tres-humblement sa Majesté par la responce qu'il donna audit sieur de Pontchartrain, de l'excuser s'il ne la pouuoit accompagner en son voyage si subit & si precipité, iusques à ce qu'il luy eust pleu donner ordre & pouruoir à la reformation de ses Conseils, & aux desordres de son Estat, & fait rendre la Iustice de ceux qui en sont les auteurs, comme aussi du soldat Italien de la Citadelle d'Amiens, pour l'assassinat commis en la personne du sieur de Prouille.

Or ne scauoit pas lors ledit Seigneur Prince, que sous ombre de ceste conference on auoit dessein de l'inuestir & surprendre dans Clermont, ainsi qu'il eust esté infailliblement s'il y eust seiourné plus long temps, car pour executer ceste trahison, proiettée par le Marechal d'Ancre & ses supposts, on auoit fait aduancer quelques compagnies d'hommes d'armes & de cheuaux legers es enuiron de Clermont, & rien ne leur a manqué que l'occasion : Mais maintenant il ne faut pas s'estonner si on a rompu ladicte conference, & la negotiation encommencée

par Monsieur de Villeroy, puis qu'elle ne ser-
uoit que de couuerture à vn si méchant & perfide
dessein, quoy que depuis on l'aye voulu des-
guiser.

Puis donc que le malheur de la France est tel,
qu'on reiette tous moyens propres & conuenables
pour y restablir l'ordre nécessaire, & éviter
le peril qui menace tout le Royaume d'une en-
tiere dissipation, que des moyens legitimes on
est reduit aux extremités, par l'extreme violence
& conspiration de si desloyaux Conseillers.
Bref, les choses estans montées au supreme de-
gré de desordre & de confusio, le mal croissant
de plus en plus, & s'irritant par douceur des re-
medes, la prudence humaine reduite à vne ne-
cessaire option de maux n'est plus empeschée
qu'à suiure les moindres, pour destourner les
plus grands.

Pour ces causes, Nous HENRY DE BOVR-
BON, premier Prince du sang, & premier Pair de
France, assisté de plusieurs autres Princes, Ducs,
Pairs, Officiers de la Couronne, Gouverneurs
de Prouinces, Seigneurs, Cheualiers, Gentils-
hommes, Prouinces, villes & communautés tât
d'une que d'autre Religion, faisans la meilleure
& la plus saine partie de ce Royaume, associés
ensemble pour sa conseruation. Declarons &
protestons deuant Dieu & les hommes, que
nous ne consentons & ne participons aucune-
ment aux pernicioeux conseils dont on vse au
gouuernement & administration de cest Estat:
que nous detestons toutes factions, entreprises
& intelligences contre l'autorité du Roy; que

nostre but est, & n'a oncques esté que de rendre à sa Majesté la treshumble obeissance que nous luy deuons, & à la Roynes sa mere. Mais voyant que l'on preuient l'esprit de leurs Majestez de mauuaises & faulces persuasions, qu'on abuse du nom & de la ieunesse du Roy, & de la bonté & trop grande facilité de la Roynes, dont les volontez ne sont pas libres, & que leurs Majestez par la iuste crainté des forces de ceux qui les environnent & tiennent continuellement assiegez, sans permettre aucun accez, sinon à ceux de leur faction, sont contraincts d'autoriser leurs passions: que l'on machine la ruine des bons François, qui souspirent comme nous apres la reformation de l'Estat, Nous nous sentons obligez de nous opposer à ces violences, & d'exposer tout ce que Dieu nous a donné au monde, nos vies mesmes, pour faire recognoistre le Roy tel qu'il est, le tirer de l'oppression & des perils qui le menacēt, faire entretenir les Edicts de pacification, procurer le soulagement du peuple, faire regner la iustice, defendre les bons, & les garentir contre toute violence, faire punir les meschans, & restablir toutes choses en leur ancienne splendeur & dignité, par vne generale & vtile reformation de tant de desordres, & par la iuste punition de ceux qui en sont les auteurs, auquel nous imputerons tous les inconueniens qui peuuent arriuer de la iuste defense, à laquelle ils nous ont reduits, dont ils seront seuls coupables, puis qu'au lieu d'arrester le mal qui menace l'Estat, ils le hastent & precipitent, ayans donné les conseils de rompre la

conferēce, & refusé tous moyens & conditions iustes & raisonnables, afin de porter le Roy à vne guerre non necessaire, & partant iniuste, pour aux despens de sa Majesté se venger de leurs passions, par l'effusion du sang de ses bons & fideles subiects. Declarons que les armes que nous serons contraincts de prendre pour cest effect, n'estants que pour le Roy & pour sa liberté, pour la conseruation de sa personne, de sa Couronne, & des loix fondamentales du Royaume, nous serons aussi tousiours prests de les poser, quand sa Majesté plus libre & mieux conseillée, aura pourueu aux choses cy dessus representées, & autres plus particulièrement déduictes par les remonstrances de la Cour de parlement, & par les cahiers des Estats: Et iusques à ce qu'elle y ait apporté par sa prudence, des remedes certains & conuenables, nous la supplions tres-humblement, de donner ce contentement à ses subiects de differer son partement, attendu le notable preiudice que sa Majesté pourroit autrement receuoir par l'alteration des cœurs & affections de ses peuples, dont les miseres & calamitez, qui sont extremes & lamentables, leur feroient porter impatiemment de ne recueillir de l'assemblée des Estats, le fruiet & le soulagement qui leur a esté tant de fois promis. Et d'autant que les mariages des Roys ne sont point affaires particulieres & domestiques, mais leurs Royaumes & Estats y ont tres-grand interest, comme choses qui peuuent entretenir ou rompre la tranquillité publique. Nous supplions tres-humble-

ment sa Majesté d'y vouloir faire garder l'ordre & chercher les seuretez necessaires en affaires de telle consequence, pour garentir son Estat à l'aduenir contre les entreprises qui s'y pourroient faire à la faueur de son mariage. Et pour cet effect, auant toutes choses, en faire verifier & enregistrer le contract au parlement, ainsi que par les termes d'iceluy elle y est expressément obligée, & qu'il a esté practiqué de tout temps: ensemble vne declaration, par laquelle sera ordonné en consequence & execution des anciennes ordonnances & loix du Royaume, que nuls Espagnols, ou autres estrangers ne seront admis en aucunes charges, gouuernements, offices, benefices, capitaineries, ny autres fonctions publiques dedans le Royaume, ny offices domestiques en la maison de la Roynie future, ainsi qu'il se trouue auoir tousiours esté practiqué en tous Estats, notamment en Angleterre, lors du mariage de la Roynie Marie avec philippes prince d'Espagne, où pareille declaration, pour pareille cause, & pour éuiter pareils inconuediens, fut verifiée au parlement du pais. Et pour leuer les soupçons & iustes defiances que les alliances d'Espagne, à cause de la precipitation dont on vse pour les accomplir, ont donné à tous les alliez de Frâce: Nous supplions aussi sa Majesté d'entretenir & confirmer denouveau les anciennes alliances & confederations que le feu Roy d'heureuse memoire, renouuellées avec tant de soing & de prudence, avec les princes, potentats & Republiques estrangeres, comme l'un des plus certains
 moyens

moyens de la seureté de son Estat, & du repos de la Chrestienté. Que si nonobstant ces conditions si raisonnables, si necessaires & si legitimes, on fait aduancer les forces du Roy contre nous, ou aucuns de ceux qui sont associez avec nous, (ce que nous attendrons auant que de nous resoudre à nous defendre) on ne doit trouuer mauuais si nous opposons à ceste violence vne iuste & legitime defense, la nature & la necessité permettant à tous hommes de defendre leurs vies, & de repousser par tous moyens la force par la force, ne nous restât plus pour nous garentir du mal, sinon de recourir aux remedes extremes, qui neantmoins doiuent estre trouuez iustes, puis qu'ils sont necessaires, lesquels ayans éuité tant que nous auons peu, nous voudrions bien encor à present ne nous en aider, sinon que nous sommes reduits à ceste extremité, ou de voir l'extermination de la maison de France, & en icelle la ruine de l'Estat, ou vne defense legitime & necessaire pour la conseruation de l'un & de l'autre.

Prions & exhortons tous les Princes, Pairs de France, Officiers de la Couronne, Seigneurs, Cheualiers, Gouverneurs, Gentils-hommes, & autres de quelque qualité & condition qu'ils soient, tous les Parlemens, tous les Ordres & Estats de ce Royaume, toutes les villes & communautéz, & generallyment tous ceux qui se disent encore François, & qui ne se sont encore ioints à nous, de nous secourir & assister en vne cause si iuste. Requerons & adiurons tous les Princes & Estats estrangers, tous les anciens al-

liez & confederez de cest Estat, de nous y prester ayde, faueur, & assistance, & ne permettre que de si bons & loyaux subiects, les Princes du sang & autres Princes, & principaux Officiers de la Couronne, soient opprimez par vne telle coniuration, pour la consequence qu'elle apporteroit à tous les Estats de la Chrestienté. Fait à Coucy le 9. Aoust 1615. Signé HENRY DE BOURBON.

LETTRE DE MONSIEUR
LE PRINCE DE CONDE.
AU ROY.

SIRE,

Vostre Majesté aura appris par ma lettre du 27 du passé les iustes raisons qui m'ont cōtraint de luy nommer ceux qui sont auteurs & cause des maux qui trauaillent vostre Estat, & de la supplier, comme je fay encor tres-humblement de vouloir auant son partement donner vn ordre certain & assuré à ses Conseils, pouruoir aux desordres qui vous ont esté cy deuant representés, tant par les remonstrances de vostre Cour de Parlemēt, que par les cahiers des Estats generaux, faire punir ceux qui se trouueront coupables, & rendre la iustice de l'assassinat commis en la personne du sieur de Prouille Sergent Major de vostre ville d'Amiens, & de m'excuser si iusques à ce qu'il ait pleu à vostre Majesté pouruoir à ces choses, ie ne la pouuois

accompagner en son voyage, à cause de son subit & précipité partement. Mais d'autant, SIRE, que ceux qui ont donné à vostre Maiesté les conseils de rompre la conference & negociation de Monsieur de Villeroy, qu'elle auoit auparauant trouué bonne, & iuger necessaire pour son seruice, & qui ont tousiours pris plaisir de rendre toutes mes actions odieuses & suspectes à vostre Maiesté, quoy qu'il ne s'y puisse remarquer que fidelité & integrité, luy pourront sur ces occurrences éguiser ce qui est en mes intentions, calomnier mes actions à l'endroit de vostre Maiesté, & respendre leurs calomnies par tout vostre Royaume, mesmes par toute la Chrestienté. I'ay estimé, SIRE, estre obligé pour l'intérest que i'ay de garentir mon honneur & ma reputation, d'enuoyer à vostre Maiesté ceste declaration signée de ma main, en laquelle ie supplie tres-humblement vostre Maiesté de voir par son œil equitable mes actions & deportemens passez, leurs causes & leurs effects, & les mauuais & pernicieux conseils des ennemis de vostre Estat, qui en esbranlent les loix, & les loix & les fondemens, pour le porter à sa ruine. Vostre Maiesté y recognoitra ma patience & mon obeissance, leurs iniustes procedures, & les violences, & entreprises qu'ils font tous les iours contre l'autorité de vostre Maiesté, laquelle ie supplie aussi tres-humblement trouver bon que i'enuoye ladite declaration à toutes vos Cours de Parlement, & autres corps notables de vostre Royaume, & à tous Princes & Estats vos allies & confederez, afin que chacun

puisse cognoistre à quoy tendent mes actions,
 qui n'ont eu & n'auront iamais autre but que le
 bien de vostre Estat, & la conseruation de vo-
 stre Couronne. Et sur ceste veritable protesta-
 tion que i'en fay à vostre Maiesté, ie prie Dieu
 qu'il vous assiste de son Esprit, pour manier vo-
 stre sceptre en paix & tranquillité, vous inspirer
 de bons conseils, vous susciter de bons & fide-
 les Conseillers, vous donner force, prudence &
 courage pour composer les mauuaises humeurs
 de ce Royaume, consolider ses playes, & de-
 stourner les malheurs qui le menacent, & me
 rende si heureux que de pouuoir continuer à
 rendre toute ma vie à V. M. le tres-humble ser-
 uice, à quoy la nature & mon deuoir oblige,

SIRE,

De Coucy le 9
 Aoust 1615.

Vostre tres-humble & tres-obeïssant
subiect & seruiteur HENRY
 DE BOURBON.

A LA ROYNE.

MADAME,

La régence de cet Estat, dans le bas aage du Roy mon souuerain Seigneur, vous a conserué, & préparé en suite le pouuoir dans les affaires, mais les Ministres abusans de vostre bonté, innocente du mal, preferans leurs desseins particuliers au bien de l'Estat, ont excité vne clameur publique, qui a ietté deuant vos yeux les remonstrances du Parlement, ouyes, leuës & imprimées, & toutesfois negligées par opiniastrété, par desseins & sans raison. Les cahiers des Estats estouffez, contre la reigle ordinaire qui requiert verification dans les Parlements, l'audace & la temerité d'aucuns desdits Ministres coupables des desordres de l'Estat, le mal croissant m'ont fait quitter la Cour vn temps pour le dissimuler, esperant le reestablissement, sans me plaindre, le tesmoignant par mes mescontentemens, sans en esmouuoir la France, laquelle estant en peril, ma naissance, ma fidelité & mon courage m'obligent, pour me garentir de blasme, de vous en descourir la cause, que vostre Majesté seule peut arrester, & me plaindre de quelques lettres enuoyées sous l'autorité du Roy, dont l'on abuse insolemment, par toutes les villes de son Royaume, portans defenses de m'en ouvrir les portes, ce qui ne vient que de ceux qui se sentent coupables des maux qui ruinent l'Estat, & qui excitent la guerre, esperant dans la confusion se garentir du iu-

ste chastiment qu'ils ont merit . Mais confide-
 rez, s'il vous plaist, Madame, qu'il n'est pas rai-
 sonnable que pour la dem de que ie fay de leur
 iustification ou de leur condemnation, toute la
 France soit port e   sa ruine ineuitable. Vostre
 Maie t  peut empescher ce malheur, faisant
 qu'ils soi t remis   la iustice. Et lors ie ne man-
 queray de suiure le Roy par tout o  il luy plaira
 me commander. Mais cependant ceste action
 comblera vostre vie & vostre a ge de benedi-
 ctions: Prenez donc de bons conseils, Madame,
 quittez ceux du present, puis que par l'euene-
 ment ils se sont trouuez pernicioeux: contentez
 vous des vostres, & de ceux que vostre bon na-
 turel vous fournit, chassez tous ces Ministres
 coulpables, & indignes des charges publiques,
 croyez celuy qui par nature, par affection & par
 deuoir a interest   la conseruation du Roy,   la
 vostre, &   celle de l'Estat. Et le remede ne se
 pouuant trouuer par mes tres-humbles prieres
 & remonstrances, pour garentir la France de sa
 ruine totale: excusez moy, Madame, si ie m'op-
 pose au mal, gardant l'obeissance au Roy, & le
 respect qui est deu   vostre Maie t . l'enuoye au
 Roy la Declaration & iustification de mes a-
 ctions pass es, & de ce que j'auray   faire   l'ad-
 uenir, qu'il communiquera, ie m'assure   vo-
 stre Maie t , desirant demeurer,

MADAME,

Vostre tres-humble & tres-obeissant serui-
 teur & subiect HENRY DE BOURBON.

*A MESSIEURS DE LA COUR
de Parlement.*

MESSIEURS,
 Vostre establissement & possession dans la direction des affaires publiques du Royaume vous obligeant par le deüoir de vos charges, mes desseins estans bornez à la conseruation de cet Estat, aux anciennes maximes & libertez d'iceluy, de fortifier de vos conseils, deliberations & resolutions, l'esprit du Roy, & celuy de la Royne, & guerir par chastiment le mal formé par les Ministres coupables, qui approchent leurs Majestez. Ce que le public espere de vous, fondé sur les actions genereuses & vertueuses de vos predecesseurs, & les vostres. Vous avez reconnu le mal de la France, vous l'avez touché, vous m'avez iustement resveillé dans mon courage & ma naissance : ma patience pendant huit mois dans les desordres du public, tesmoignant tousiours vn mescontentement perpetuel, iustifie mes actions, & le respect que i'ay porté à la Royne dans son courroux excité par les Ministres. Ma qualité m'oblige d'aller au deuant du mal, & le couper, ferme toutesfois dans les resolutions de suiure vos bons conseils, & y deferer comme estans les bons & fideles seruiteurs du Roy & de l'Estat, sans interests particuliers, avec protestation de perdre plustost la vie, estât ce que ie suis à la France & au Roy, que de suruiure à son mal-heur & affoiblissement de la Couronne. Je fay cognoistre par mon escrit, for-

rifiant vos remonstrances, le mal & les desor-
 dres du Royaume, pour le rendre plus prompt
 à la guerison. Continuez donc en vos genereu-
 ses resolutions, & ne permettez que pendant le
 bas aage de sa Majesté, les Ministres de l'Estat
 pour contenter leur ambition, se seruans du nō
 du Roy, pour autoriser leur gouuernement,
 perdent & diuisent ceste Monarchie, opprimēt
 les bons fideles seruiteurs du Roy, ruinent les
 anciennes maximes & loix fondamentales de
 l'Estat, pour la conseruation desquelles vous a-
 uez esté establis, les peuples vous en accuseront
 si vous y manquez, & vous en serez respon-
 sables enuers Dieu & le Roy, lors qu'il aura pris
 conoissance de ses affaires. loignez vos desseins
 avec les miens qui ne tendent qu'au bien du pu-
 blic, sans aucun interest particulier: ainsi ie vous
 le iure & proteste, vous suppliant de le croire.



